

四庫全書

史部

欽定四庫全書

譚襄敏奏議卷十

明 譚綸 撰

沿邊缺乏火器速乞請發以充備禦疏

隆慶四年  
四月二十

題 五日

准巡撫順天都御史劉應節咨據薊州永平昌平密雲各兵備道呈稱闕乏火藥器械相應題請一體給發等因備咨到臣臣惟禦敵之技必以火器為先火器之用

又以多多為善益多則點放無窮足當其蟻聚之攻少則擊發有限莫勝其靖集之矢前此禦敵專待於應援之兵故所用火器亦惟應援之兵是賴故今惟標兵火器可言精且備耳至於各邊之器則皆束之高閣以待查盤並不敢分之塞垣以備戰鬪去年以來建造敵臺臣遍行各路搜刷火器以為守臺保邊之具始知其無備而紛然具以為請臣固不敢不竭犬馬之力而為多方營置之圖但自抵鎮以來講求車戰繕治器械晝夜

無休比至去冬業始粗備而諸營呈討鳥嘴銃及各路  
呈討鐵佛郎機以備極衝之守又日不暇給今准咨稱  
缺少佛郎機至五千零二十位快槍至八千二百桿缺  
少鉛彈至六十七萬七千箇火藥至五萬六千二百斤  
若不亟為題請而惟責之本鎮自辦不惟料價無處抑  
且人力有限况見缺佛郎機快槍之數亦據三四年所  
建臺數之需言之耳若合一千五百臺計之所用之數  
尚多及稱火藥鉛彈聽本鎮自辦亦自薊昌具呈之數

而言密永二道尚未慮及若以四道十四路每年合用火藥鉛彈皆辦自本鎮誠恐原留料價之銀不足以備十分之三伏望皇上軫念畿輔重鎮邊備廢弛勅下該部將所缺佛郎機快槍俱如數給發仍每道量給火藥五萬斤大小鉛彈五十萬箇聽臣等多方計處分投製用如此則重險不至視為虛器長技不徒託之空談而敵衆亦當有所懲創矣

即事效忠再飭春防大計以慎固疆場疏

隆慶四年五月

二十一  
日題

准兵部咨該本部題職方清吏司案呈奉本部送兵科  
抄出巡撫宣府等處地方贊理軍務都察院右副都御  
史王遴題內一欵免入衛遊兵以均戰守該本部看得  
巡撫都御史王遴等所陳免入衛遊兵以均戰守一節  
大率謂該鎮東路遊兵既議照舊專護南山遊兵一枝  
專防鎮城止遺正奇二營不敷戰守欲將更番入衛薊  
鎮遊兵一營行令發回留備本鎮候薊鎮的有警急與

正奇等兵一併入關援剿查得本年八衛兵馬已經薊  
鎮軍門分布防守各有信地遠難議撤相應勘處合無  
備行薊鎮督撫官查照所議將宣府入衛遊兵應否發  
回防禦聽其有警應援倘或南山一帶有警薊鎮作何  
策應勘議停妥咨報前來以憑議覆等因題奉欽依備  
咨到臣該臣會同整飭薊州等處邊備兼巡撫順天等  
府地方都察院右僉都御史劉應節議照薊昌二鎮先  
年分為十區每區俱派入衛客兵一枝以備截殺宣府

入衛遊兵一枝向分付在馬蘭谷防守其來已久非創  
始自今矣今宣鎮之所謂南山即指薊昌二鎮邊牆而  
言也宣鎮所謂重南山乃所以重京陵即薊昌所謂守  
邊城即所以守京陵也今若裁減宣鎮衛兵一枝則馬  
蘭一區缺軍截殺而馬蘭將不守矣馬蘭一處不守則  
全鎮為之騷然而陵京亦不免於震動宣鎮南山之重  
亦徒託之空言而無益矣此其不可一也况薊鎮入衛  
之兵其舊益二十枝遞減至今乃十枝耳而數又不足

三千於內如延綏三枝則每枝僅二千二百人寧夏固原大同四枝每枝各二千七百人耳遽年以來又各紛議罷而事難必從今更使近者罷去遠者安能但已而薊鎮二千四百餘里之邊將何以為守乎此其不可二也伏望皇上軫念薊鎮為全邊第一重地勅下該部將宣鎮遊兵一枝入衛如故仍執為一定之議以便遵守免致搖惑人心如此則畿輔幸甚臣等不勝幸甚

感激非常恩遇披誠請兵以備戰守以圖補報疏

六月十  
題

本年四月初一日據山東領班署都指揮僉事楊文呈  
奉臣帖將遊擊將軍陳其可督同原任守備義勇右衛  
指揮僉事孟杰新募奇兵一枝通行管營訓練仍照原  
案多方召募遇有來投查審真正名籍陸續呈報驗發  
收伍等因到臣所據都司楊文等召募新兵三千名相  
應內以一千五百名抵補入衛陝兵原分布黃花鎮寧  
夏一枝古北口曹家寨延綏一枝各原減五百之數餘

一千五百名即抵今革退忠順軍二千之數俱屬臣標下另設專將統領訓練候臣通融分布各路防守合用月糧照舊於各營路缺額主兵數內支給仍遵照題准事例全給行糧每年會計於客兵額內動支庶人心樂從而無復有散逸之患及照畿輔之地人易資生塞上之役事宜効死人不樂於應募以故前此募兵非不嚴行督責卒未見有成效今於一年之間募足三千之數實由陳其可楊文孟杰多方招徠與用心撫輯所致不

然未易辦此除陳其可見充河間遊擊外合無即以山東領班都司署都指揮僉事楊文量陞遊擊職銜統領訓練以需實效其楊文領班員缺即以原任守備義勇右衛指揮僉事孟杰代補庶幾在新軍則兵將相識在班軍則統馭獲人軍既皆得實用而或修或守盡為有資矣再照本鎮召募之法本為節省財用計也今減去入衛與忠順官軍三千五百員名正駄馬一千七百餘匹而補以募兵三千即給與全支行糧其所省誠為不

少但入衛官軍一千五百月糧皆屬彼省關支盔甲器械乃其自備在薊鎮不過支與行糧料草耳今募兵則月糧皆取諸本鎮盔甲器械皆從官給其所費亦甚不貲是用入衛之軍在各鎮則士馬多勞錢糧多費而薊鎮實安享其成從召募之法在各鎮雖甚蒙其利而薊鎮仍未見其省臣愚竊謂自是而後不如且罷召募之法仍從入衛為便如蒙伏乞勅下該部再加看詳定為畫一之規併行上請行臣等遵照而行臣愚幸甚邊疆

幸甚

營務初更條陳未盡事宜以飭戎政以裨安攘疏

七月三  
日題

准兵部咨該巡視京營魏給事等題查班軍以資護衛  
竊惟班軍之役專以強幹弱枝拱護京輔祖宗神謨為  
慮遠矣邇來事規漸紊法久弊生官利其賄則有賣放  
頂替之私軍畏其苦尤多買脫竊逃之弊及至入京不  
論工之大小盡數撥在工所在營將官不相統屬兩相

躲避既不在工又不歸伍不惟人無實用又且徒費月  
糧此班軍之所以極敝而不可不亟為之處也臣等議  
欲預行彼處撫按都司兵備等官將該班軍各照額數  
清催精壯統領赴班分投各營操練與京軍一體賞罰  
亦可資為戰守再照先年薊遼總督題議將河南山東  
上班壯軍撥一萬六千餘名赴鎮協同防守將老弱者  
留京以不教之軍守極衝之邊在邊方徒糜糧餉于京  
營實妨大計合無將薊鎮防守班軍酌量撤回該本部

覆議祖宗時定居重馭輕之制每年令外衛官軍更番  
赴京操練自嘉靖間敵犯畿輔地方已將大寧等衛官  
軍留各關隘守把近又議將鳳陽守陵官軍留在彼處  
防守僅此山東河南中都等三都司官軍轉流京操却  
又每年借戍薊州一萬六千員名今查得春班該赴京  
者不及九千員名適又遇有殿閣工役尚且不敷撥用  
動支太僕寺庫銀募夫以充班軍做工此其積衰廢法  
不但統領劄付官作弊及在營操練無法而已委當及

時查處合無通行山東河南鳳陽等處各該撫按官轉行兵備該道嚴責各衛掌印等官自今秋班為始各該班軍赴京者要照額數遴選精壯責令勤能委官督發起程到部發營操練其借撥薊鎮防邊官軍一萬六千員名亦咨總督侍郎譚綸急速補練土兵刻期退回京營無致久假不歸等因題奉欽依咨行到臣臣看得在河南山東京操班軍各二枝每歲春秋兩防各一萬二千員名乃臣等與前總督侍郎曹缺先後題請節該兵

部題奉欽依屬見薊鎮分班防春防夏防秋一以備撤  
兵空虛之時一以為更番訓練之計在京營戰兵三千  
乃巡倉御史議將通州官軍撤回防守兵部議以戰兵  
三千抵補薊鎮先年改入京營遊兵六千與見今撤回  
通州官軍之數在原議並非暫借於薊鎮亦非久假況  
薊鎮與敵僅隔一牆保固薊鎮即以拱護京師薊鎮誠  
急朝廷尚當別行遣將發兵以為聲援以張天討京師  
則堂奧也薊鎮則門戶也徵列省之兵以實京營誠得

居重馭輕之法出京營之兵以守門戶亦為攘外安內之圖事均一體情非泰越謂之久假不歸臣固有所不敢責之尅期退回勢亦有所未能伏望皇上軫念薊鎮精兵歲減邊患可虞且人心易搖秋防已迫勅下兵部將先後請發班軍一萬二千員名存留薊鎮如故仍馬上差人齎文二省撫臣將秋防赴邊班軍嚴加挑選依期督發其京營戰兵二枝每枝各一千五百名仍定以慣戰邊將以七月十五日為期統領前來以便分布如

此庶人心知有定向不致觀望悞事而邊疆實有賴矣  
哨報東西諸部合謀大舉請乞預調保邊入援兵

馬以助戰守疏

本月二十二日酉時據分守石塘嶺叅將陳勛揭稟白  
海子迤北瞭見敵兵約長七八十里於八月十三日起  
身往東北行走又據薊鎮總兵官戚繼光揭稱西路敵  
兵十分重多已到境外地名商都等因各報到臣該臣  
督同鎮巡等官查照節年事規將主客官軍酌量地勢

衝緩題請分布乘牆列守而又議以黃花居庸鎮邊三路有警該昌鎮總兵官楊四畏統領本標官兵首先應援迎敵古北牆子嶺曹家寨石塘嶺有警該西路副總兵官李超統領本營并臣標將李如欖等標兵首先應援迎敵馬蘭松棚太平三路有警該總理都督戚繼光首先應援迎敵燕河臺頭石門山海關四路有警該東路副總兵官胡守仁統領巡撫標下及本營標兵首先應援迎敵而臣與巡撫都御史各往來督理遇警隨營

調度各該總協等官本路無警他路有警即使相機策應夫分路列戍布置雖詳但邊長人稀全仗軍門鎮巡協守標兵近者則首先迎敵遠者則相繼應援設使直入一路或分入兩路又地方相去不遠即有二三十萬之衆臣等以四標全力合併拒阻即不資外助可保萬全但今據所報西路且有二十萬衆東路懲創徃年挫衄之事糾合各部計亦不下十萬屢報西路謀入黃花鎮而東路又謀入古北口東西又謀入馬蘭谷是分為

三路矣東路則謀入義院口為石門寨所屬又謀入界嶺口為臺頭營所屬又謀入冷口為燕河營所屬又謀入潘家口為松棚谷所屬即未能四路並入但今四路內屬諸蕃各自逃去亦必有分入二路之意且一路遇敵左右二路俱當戒嚴是薊昌一十四路東西相去二千餘里處處受敵臣等各標之兵可以應援截殺者纔有四營東二營合車騎步兵計三萬有奇昌平一營不滿六千又抽諸長陵等八衛之人最為脆弱難恃所堪

恃者僅東之三營耳以三營三萬之兵而當三十萬五  
路入人之衆已為力不能支而况黃花鎮為陵寢重地  
臣必自將密雲一營合昌平標兵誓死以當黃花一路  
則所謂古北石塘曹家寨牆子嶺首先迎敵已無其兵  
而東路既欲分入二處則副總兵胡守仁即合巡撫標  
下之兵其力亦難兼顧總兵戚繼光協總胡守仁即如  
初議遇警首先迎敵亦再無別兵可以調發相繼應援  
臣等用是苦心籌畫無所措手為今之計合無請乞勅

下該部預將保定鎮巡應援兵馬行令整捌三枝星馳前赴密雲聽臣分撥標兵三千相兼前去駐劄石匣營適中地方專備古北牆子曹家寨石塘嶺有警分投赴邊併力拒阻又行遼東鎮巡官預將入援人馬星馳進關至石門寨臺頭營屯劄專備東路土蠻如果分入二處總兵王治道與副總胡守仁督兵分投拒遏巡撫都御史劉應節往來調度俾臣得以專當黃花鎮一面保護陵寢戚繼光專當馬松太平三路如或黃花一鎮無

警臣仍率協總李超標將李如樞等專待牆古曹石首  
先迎敵而以保定援兵分發西自牆古曹石東至馬松  
太平遇急策應又或牆古曹石無警而敵悉衆分入馬  
蘭以東臣則親率標兵以東而以保定應援兵馬留在  
平谷以西一則防備西路突厥我虛一以預備內地又  
或馬松無警而牆古以西或得潰入則戚繼光躬率全  
營標兵星馳而西與臣連營奮戰如此則勝算粗定不  
致顧此失彼若謂二鎮援兵必待敵已潰牆而後入關

策應則有焦頭爛額之功不如曲突徙薪之萬全也伏  
望聖明軫念敵衆兵寡俯賜俞允畿輔地方幸甚臣愚  
不勝幸甚

查陳舊例漕運疏

准巡撫順天都御史劉應節咨據昌平道兵備僉事宋  
守約呈遵蒙案驗事理行准總理昌平糧餉戶部主事  
張克家手本回稱緣由為照昌鎮地方設居陵寢切臨  
邊隅軍多民少地窄農稀年例主客糧草俱于四外收

買轉運艱難商人疲累已屬難支今若以漕糧折價萬一各商糴買不前到累逋遼邊軍仰給無資臨時悞事干係匪輕合無姑如管糧衙門所議仍發本色漕糧查照先年舊例責令原運官旗徑運大通橋下堆卸本鎮委官帶領車戶駄運該運官旗各赴該倉晒揚交納庶車腳無揀和之弊而邊軍得實用之惠矣惟復仍運通倉收貯責令經紀轉運等因據呈備由咨覆到臣議照昌平地方委係邊隅土地確出產穀票甚寡上年戶

部將漕糧發銀召買所司深以為難臣等據文題請已  
該戶部撥酌准覆于脚價有省然召商收買實於事體  
難行所據兵備管糧衙門會議不惟當從通州仍令經  
紀轉空且欲復照先年由大通橋官旗徑運為便臣等  
覆加叅酌委宜率由舊章難於因噎廢食動事更革伏  
乞勅下該部再為詳定覆請畫一遵守施行

遼東急缺大將乞早推補先褒死節以作忠勇疏  
據險山叅將郭承恩報敵人聚兵要搶廣寧錦義地方

總兵官王治道隨自關西回還徑至義州適中地方防禦遇敵兵四萬餘騎王治道提兵追剿忽遇伏兵三萬餘騎突起王治道見其勢衆併力血戰殺敵不計其數王治道并郎得功均被射砍身死家丁選鋒官軍亦有損傷其大營兵馬並無損折敵人從原路出境去訖等因備報到臣臣督屬雖遠而大將陣亡亦難辭責謹席藁待罪外前項事情本宜從彼中撫按會同具奏但臣面詢走報夜不收任友才稟稱敵兵往東北退遁本處

既未得手尚恐要犯廣寧等因則巡撫官正屬調度截殺之時而巡按相去又遠且大將云亡人心解體必候合疏以聞誠恐別失事機所據總兵官員缺相應先行具題伏乞勅下該部作速會推謀勇無資將官一員前去任事仍乞比照先年陣亡總兵官殷尚質楊照事理將王治道郎得功先行題請褒錄予以安地方於目前慰忠魂於地下

薦舉兵備官員以備錄用疏

臣奉命總督薊遼保定等處軍務已及三年茲當陞任  
所據督屬兵備官員例應薦舉臣謹查得分守遼海東  
寧道叅政張邦土精明宏博重厚老成以恬淡而飭躬  
不務先人以賢智崇樸忠以明職真能為世之表儀定  
驛傳之章程明屯種之規則具見其經畫之大嚴收堡  
之號令設路河之墩牆足知其防禦之周賞罰明而人  
心思奮更歷久而勞勳獨多整飭大名兵備副使張佳  
脩學有淵源才堪經濟留心飭武列郡多可戰之兵正

已率人一道無犯贓之吏誥戎則每嚴清勾逋逃者盡歸於伍救災則務先窮困昏墊者胥匡以生提一旅以備邊軍威甚盛操三尺以馭下憲體何嚴真可謂人倫之表而能備緩急之用整飭冒平兵備僉事宋守約揮霍宏才光明俊業掣肘而處盤錯之具區操割不難於迎刃抗志以圖安攘之實政經營獨見其苦工持憲具凜凜之風裁一路之豺狼屏跡馭衆有休休之器度全鎮之羣虎傾心建臺建城皆挺身任事故能先衆以成

功議餉議兵則獨立敢言不為曲學以阿世克勤克慎  
真懷忠抱赤之臣有守有為先康濟保釐之器分守遼  
海東寧道兵備僉事劉田博雅不羣清真可則當軍民  
錯雜之地處置盡合于人情峻內外出入之坊備禦每  
先於勝算督率則遍歷險阻何異於胼手胝足之勞秉  
憲則獨持風裁常聞其發奸摘伏之事敵每畏威而遁  
吏不緣法為奸整飭遼東寧前兵備僉事任彬嚴毅不  
阿沈潛不露懲奸剔蠹一道之弊肅風清列戍修垣三

載而民安盜息備寇則人人用命鼓舞自見其多方清  
屯則井井有條區畫足知其極密以上諸臣皆一時藩  
臬之選所當薦舉以備擢用內僉事宋守約資勞已及  
四載春秋共歷七防望重而心愈謙宦成而志益勵所  
宜特薦以備破格超擢者也如蒙伏乞勅下該部再加  
查訪如果臣言弗謬將張邦土等循資擢用宋守約破  
格超待如此則人思感奮而邊備為有裨矣

舉劾有司官員以昭勸懲疏

臣據督屬有司官員例當舉劾謹查得順德府知府馮善溫恭有度正直不阿易俗移風知化導之在已能躬先於儉約救災恤患若痼瘳之切身遂力拯其啼號百廢俱興四知尤慎廣平府知府賀賁貞至絕俗人不忍欺明照覆盆冤獄為之盡洗法行近習積蠹因而一清

不猛不寬能勤能慎保定府知府賈淇重厚有文精明不刻當三輔之首衝迎刀足占其利器拯百姓之胥溺設心獨苦於良工冰清玉潔之操吏畏民懷之政真定

府知府楊道亨溫文謹飭正大光明寓撫字於催科黎庶每歌其善政以廉平為治體僚屬盡慕其清操事必為之調停法能行於豪右大名府同知朱一松和而有執介不為名處事務盡周詳衆皆稱便鞠獄無為深刻民自不免左右不敢為奸黎庶咸懷其惠管通州事河間府同知劉耀武沈潛能斷果毅有為當盤錯之具區操割不煩遊刃處驕滑之衛卒駕馭自是長才永平府同知賀濤忠信明決重厚老成案牘必親胥吏無舞文

之弊蘆隅自峻門庭絕請謁之私遵化營管糧河間府通判王建鎮鋤利器科第遺英守邊則議保障之長圖不獨恃其山川險阻署篆則修循良之實政尤如意於著壯猷居庸關管關保定府通判法曠雅有文辭習明吏事褪身清謹志不耻於抱關立志廉平才尤優於守郡承委能事事不苟議法則井井有條保定府推官蔣希孔儀容修潔操履方嚴不察察以為明法令自行於

頑滑每摶摶以為善好惡獨謹於貪殘審鞠務得其情平易可以觀政大名府推官蔡汝賢人如金玉操比冰霜條上便宜每事有關於政體聽斷訟獄論法必酌諸人情廣平府推官董邦禮德器溫純才識明敏剖斷如流法律真同老吏操持似洗清苦無異寒儒河間府推官馬應夢才本明達政尚清廉掣鹽能盡得奸欺課入

猶懸藻鑑真定府推官張堯年器識老成才猷精練議

獄務為明允兩造無冤褪身克盡清廉一塵不染左右無舞文之吏菁莪多樂育之賢開州知州陳允升警敏多才沈毅有守事必求其節省經費自充獄不厭於精詳民命攸賴管房山縣事知州李琮平易可以近民明敏足以從政事至輒應弦而解真剗繁理劇之才質成能片言以折有治暴抑強之具五年清節無間始終百雉堅城足垂久遠遷安縣知縣趙雲翔駕馭長才循良古吏潔已愛民治行已空於冀北即戎講武甲兵尤富

於胷中真非百里之才可當一面之任寶坻縣知縣劉不息高明器識潔白操持理枉伸冤固無久淹之獄省刑薄罰田野有更生之民固安縣知縣馮子履人如精金美玉操比烈日嚴霜催科能屏絕鞭笞逋負獨少拯溺則胼胝手足全活何多法不撓於權豪惠每先施鞚獨遵化縣知縣王宣化言行動法古人政事足稱良吏均徭平賦事必為之畫一而權貴靡所低昂議獄慮因意每切於平反而囹圄並無冤抑有節用愛民之實

真盤根錯節之才撫寧縣知縣李一本才優治劇明可  
燭奸撫字勞心流移盡復其業催徵有法逋負悉輸之  
官不染一塵能盡三事肥鄉縣知縣李栻學有淵源才  
雄經濟寓鄉約於保甲善政真足宜民存渾厚於精明  
儒術固能飭吏事事見其精采斷斷可為循良任丘縣  
知縣胡峻德才優幹濟守更端嚴以民心為已心體悉  
務周於寒谷理官事猶家事忠誠可格乎上蒼折獄真  
以片言修城不動聲色蠡縣知縣劉伯縉博雅宏才廉

明善政法紀行之豪右宿蠹為清催徵不事鞭敲額賦  
盡起能潔已以愛民罔違道而干譽魏縣知縣徐元太  
邃學宏才英標雅操儉約出自性成民懷節省長厚由  
於天賦政尚廉平效古人罔為時套修實政不銜虛名  
邯鄲縣知縣高世雨揮霍長才循良德政邑當孔道精  
明無減於驅馳民罹大災憂勤至廢其寢食法行自近  
廉可生威井陘縣知縣鍾遐齡德性謙冲才猷縝密條  
列編審之便良法可室其弊源節省供應之煩美意遂

甦夫民瘼持已擬之食檗發奸畏其有神濬縣知縣楊沂心存公恕政尚廉平以片言而折獄動得隱情立三限以催科咸無逋賦儒術可以飭吏身教自能化民邢臺縣知縣耿鳴世性資明發操履端嚴豪右畏其威廉侵地盡歸於版籍疲民賴其賑恤仁聲遍滿於閭閻馭下嚴而有恩教民動必以禮長垣縣知縣孫鰄德性溫恭才猷敏贍地本盜賊之淵緝捕嚴而民皆帖席時值昏墊之後拯援切而衆乃胥生操比冰霜邑多弦誦滑

縣知縣劉翹才識老成政體練達割繁理劇恢恢乎遊刃有餘節用愛民歉歉然每懷靡及一塵不染六事允修昌黎縣知縣張存智練達多才沈潛有決慎刑獄而兩造無冤躬節儉而一介不苟以上諸臣雖職任各殊才器互異均之廉平公謹所當薦揚以備錄用者也臣又訪得真定府管糧通判王某小才足以集事多智可以飾奸淫刑以逞賣法貪贓藁城縣知縣易某性資迂緩才智昏庸舉動全無威儀刑罰不知可否初則柔懦

無為末乃貪贓敗度此二臣者清議不容人心共忿所  
宜亟行罷斥以警官邪者也臣又訪得興濟縣知縣公  
某年當衰暮識欠精詳聽左右一言則巨寇五人同時  
漏網甫到任數月逮無辜二命相繼含冤一味昏庸全  
無知識但蒞任尚淺為患未深此一臣者所宜降調閑  
散以責後效者也如蒙伏乞勅下該部再加查訪如果  
臣言不謬將馮善等循資擢用王某等亟行罷斥公某  
降調閑散如此則公論定而勸懲自昭生民為有賴矣

舉劾大小將領以飭邊備疏

臣據督屬大小將領例當舉劾查得總理都督戚繼光並具才識兼資文武能以其身係安危之重即艱難盤錯務成其信於先資之言每嚴其辨於義利之關雖禍福死生不變其塞於平生之守語統馭之規模則治衆如寡真多多而益辦論綜理之周密則視官猶家無事事之不親凡令必三五申具見忠肝義膽一檄即千百語皆為豹畧龍韜訓練足以動鬼神塞外之思一逞者

已竟憚其威畧忠信可以貫金石麾下之始而疑者今  
咸服其精明充其素志豈但勒石於燕然意厥成功直  
欲標柱於瀚海此一臣者真為國家之良翰而無忝公  
侯之腹心所宜隆其委任假之事權俾得展布以策奇  
勲者也鎮守昌平總兵官楊四畏滿腔忠赤刻意功名  
其治兵也則紀律甚嚴而恩又足以附衆無忝古名將  
之風其臨事也即勇往直任而謙又能以下人足稱真  
君子之譽貌類恂恂儒者勇畧實冠於三軍名則赳赳

武夫廉潔不苟於一介程功督備雖披星戴月而忘其勞養士恤軍每推食解衣而莫之吝此一臣者真為遼左之偉人無忝一方之大將所宜久其委寄進之崇階以重陵寢者也遼東總兵官李成梁忠義得之性成果敢由於天賦自結髮以從戎雅能奮鷹揚之勇惟矢心以報國幾成入虎穴之功所至以清白著聲官給養廉之田亦却之而不受至今尚澹泊自處家僅中人之產恒鬻之以為資威望久播於東方才畧足當乎大任協

守東路副總兵官胡守仁心誠許國志切寧邊嚴節制  
以練車師吏士之精采百倍懸恩信以購戰卒貔貅之  
歸附獨多申明剥削之科條軍無掊尅搜刷軍餘之影  
占身無怨懲督工則調停有方衆不勞而事集防寇則  
寢食俱廢人有感而作忠協守西路副總兵官李超英  
敏長才恢弘遠志虎鈴豹畧悉淹貫於胸中用兵而奇  
正遞出騎士車師皆精練於平日臨陣則意氣自閑當  
在南方割所愛以酬敢死之士人服其忠比來北塞轉

其弱而為有制之兵衆稱曰善遇知已於平生不忘國士之報即登壇於年少居然老將之風分守牆子嶺副總兵張臣起自戎行熟諳武畧遇敵則請為前鋒裹瘡而戰何止數十餘陣存傷痕於遍體防邊則務幹實事設險以守僅得五十八臺足保障於一方元年以標兵六百當土蠻三萬竟成棒篋崖之捷本路以主軍二千守要害六防能貽牆子嶺以安真禦侮之長才堪折衝之重任分守古北口副總兵董一元猛氣凌雲壯心噴

火壁之鷹隼志每在於青霄茹毅貌貅身不安於錦韉愛  
士能同甘苦寢食與俱臨敵不畏死生威名甚盛分  
守黃花鎮副總兵程久思又歷邊陲熟知戎務才足以  
當一面緩急之際有資智可以將萬人戰守之能胥備  
修臺則調度有法衆不稱勞臨敵則鼓舞多方人思用  
命分守太平寨叅將羅端練達多謀沈毅能斷每事務  
存大體臨陣乃見壯猷控衝關凡數百里防守惟嚴任  
邊事已五六年始終無懈太平寨之設備保障誠多李

家庄之折衝功名最著振武營叅將蔡勛渾厚精明忠信廉潔熟韜鈐而圭角不露馭衆則法令獨明寡言笑而容止若愚臨事則果敢能任建層臺於古北堅利獨冠於一時未嘗謙之口說為標將於密雲清謹有加於流輩不欲播之聲名真長慮却顧之老成堪投大遺艱之重負分守居庸關叅將孫山才如老將操則清流綜理精詳數年之積蠹為洗猷為練達一路之百廢盡興革占役以事邊工必先近習搜空丁以實行伍罔畏豪

強建臺則類其家舍愛士殆有如嬰兒既暢兵機兼優  
吏治分守石塘嶺叅將陳勛秉忠憤之心負強直之氣  
任事每期於任怨理官何異於理家撫賞務為節約且  
具感其恩威建臺獨事高堅足可垂之保障嚴撥馬之  
令私騎之弊頓除徹取魚之梁橫歛之害遂息雖毀言  
日至蓋由於用法之嚴而公論或清必得之嫉能之口  
軍門標下左營叅將李如樞沈潛有智警敏多謀論事  
則井井有條每稱一得臨文則滔滔不竭立就千言磊

落如珠之走盤真能臨機應變奮擊若鷹之搦免可與逐北追奔三仕三已凡以觸忌諱之故一弛一張人服其操縱之能山東領民兵叅將俞承光才氣英敏幹局精詳當警報旁午之秋而修守並事足占其為將之優處荒涼寒苦之地而澹泊自甘雅見其持身之潔善拊循而士心豫附未戰而勝算已成嚴節制而軍令齊整所過而市民不擾河間遊擊陳其可談笑有勇倜儻不羣寛能得衆而嚴又足以濟師允矣為大將之體射可

穿楊而遠又足以貫革居然擅北產之能却河南河間  
班軍之常例二千解逃亡事故等項之官銀一千何其  
廉潔先建牆子嶺磨刀谷之敵臺八座又建曹家寨井  
連口之敵臺七座可謂勤勞忠勇欲為古人才識獨超  
行輩輩華營遊擊李時有志事功當機明決擒首惡於  
巖穴乃夜半先登遂免生民之塗炭建危臺於邊塞不  
三月告竣屹為一面之金湯每事輒以身倡故廢墜盡  
起開口便為國計故節省誠多益有統馭之才而又兼

綜理之具者也三屯營標下右營遊擊王通論年則血氣正盛以藝則弓馬獨長遇敵輒奮臂先登一身皆膽中矢復裹瘡以戰遍體成班如彼驍雄蓋無忝於鬪將即其忠勇真可任以前鋒分守燕河營叅將史綱忠存報國志切奉公振積弱之邊軍號令一新於耳目當極衝之要路威名遠播於邊隅修臺適妻死而不能傷潔已則賓至而莫為禮本忠實不欺之心為緩急有用之器曹家寨遊擊王旌鎮密之才精明之政為臺能竭心

力磐石永固於邊關治兵必事威嚴神策頓加於疇昔  
撫屬蕃示之以信每能得其懼心除戎器務尚其精深  
有裨於實用寬田谷多疆場之斬獲剩有威名馬水口  
却巨賈之饋遺足占清節業可望之遠到志不怠於宦  
成軍門標下右營遊擊王祿操有欲上人之心負奮不  
顧身之勇開數石之弓命中於百步之外巧力俱全提  
三千之軍議戰於一路之衝志氣彌勵真有桓桓之氣  
象無慙赳赳之家風三屯營標下左營遊擊史宸年青

而才識已老藝精而膽氣甚雄提兵出塞奪回被撲尖  
夜於諸蕃之手勇有足多銳志詰戎振舉極敝軍政於  
積弱之時功為可尚臨敵能以身先乃得人皆用命行  
罰必從大始故能令在必行軍門中軍官都指揮僉事  
暴以平憂勤惕勵之心剝繁理劇之器遇事則綜理周  
密即盤錯而能為治兵則節制嚴明雖嫌怨而不避辨  
材官之能否俾人得自盡緩急多可取之長立養馬之  
規程既既有騰槽屠創免妄派之苦褪身則不染一塵

論才可獨當一面大水谷遊擊張涇器度莊凝才猷縝密領遊兵而法令齊一足占馭衆之能設邊備而樓櫓高堅具見奉公之恪清操素甘於澹泊士故歸心雅志不尚於虛誇人無異議巡撫中軍張功儀容修偉幹局精詳馭衆綽有恩威能孚衆志守已堅持清白不染半塵節制分明動有符於古法言論篤實迥不類於邊人原任遊擊取赴巡撫衙門聽用盧國讓懷忠自効見義必為負慷慨不羈之才諂媚耻同於流俗有談笑却敵

之智知遇恒左於方圓練車兵則分合進止動成節制  
真堪為有足之城造石砲則山川草木皆為甲兵足稱  
為利用之器奇計每能疊出名將實所優為遼陽副總  
兵趙完胄出將門業傳儒術忠信廉潔允克紹其家聲  
持重老成真可屬以戎務習知地利敵盡在其目中曉  
暢兵機謀必出人意表錦義叅將畢朝周才堪治劇勇  
可折衝約已愛軍終始能堅於一節設險守要勤勞並  
著於兩城實心實政同列服其功能不疾不徐百廢為

之振緝寧前遊擊楊爌秉性忠誠兼資謀勇起家世胄全無紈袴之風育秀儒門熟習韜鈐之說西平堡之斬獲武畧足稱寧前衛之勤勞保障攸賴遼東管屯都指揮僉事郭夢得丰標俊偉才識精明備禦蒲河之衝每預嚴桑土之徹應援懿路之戰輒先為士卒之倡署閫務而苞苴不行司局捕而奸盜屏息才克堪于大受志不安于小成分守馬水口副總兵宋蘭夙抱忠猷久閑武畧才已練於歷試官不怠於宦成修邊則獨任其勞

堪作百年之保障馭衆則能同其苦允為一面之干城  
分守倒馬關叅將時雨盛年博識壯志英標發跡武科  
素有平邊之策兼通文事雅崇儒將之風馭衆而賞罰  
甚明人思用命防秋則夙夜匪懈敵亦聞風分守龍固  
二關右叅將張斌忠能就事勇足冠軍生長邊方習見  
北軍之出沒曉暢兵機幾遏南牧之奔衝修臺曾歷三  
防每先期告竣即任勞任怨之不辭入援未及一月能  
因地設險而或戰或守之皆備真定標下民兵營遊擊

滿朝相年力強盛性資剛果生在邊陲習見金革而恒無懼意每出塞上喜聞笳角而勃起鬪容揮戈耀武綽有報國之忠誠結髮從戎雅負勒銘之志槩甘苦能同下士澹泊無改初心分守泰州叅將聶大經儀容雅飭法令修明統素不奉法之頑軍紀律漸行於士伍當甚難盡職之重地勤慎特冠於班行操持潔而僚屬歸心緝捕嚴而奸盜屏跡河南領班都指揮王邦憲青年美質壯志英才騎射甚優素有聲於行輩軍旅曾學亦銳

志於功名偶被屬官之欺畢為臺工所累翻然能改遂  
克蓋其前愆行之有恒終當期於遠到以上諸臣職任  
雖有崇卑才畧均能禦侮所當薦揚以需大用內副總  
兵張臣董一元素稱驍勇其志不樂守株叅將羅端積  
有年勞於例得以增秩但因節省賞銀屬蕃生怨遊擊  
王祿先年守備喜峯口甚得屬蕃之心叅將李如樞才  
堪綜理每多心計及照古北口係是極衝之關太平塞  
則為貢道牆子嶺革去撫賞諸蕃恒欲竊發臣愚謂宜

以張臣董一元改入標下左右二營統領標兵以遂其  
鷹隼欲擊之志以羅端量進一階分守古北口李如樞  
分守牆子嶺王祿分守太平寨各盡其練達有為之才  
李如樞王祿雖各未及三年但在標下百倍勞苦且以  
標將無故出為分守人情似有弗安惟復各進一階以  
作其任事之氣副總兵官李超先年以福建漳州叅將  
改守台州本官原係台州松門衛千戶蒞任未及三月  
輒見疾於本路監司致被中傷該彼處總督軍門論劾

提問雖今公論未明事尚未結臣愚謂宜憫其事出誣枉念其南北功勞准免提問領班都司王邦憲上年以違悞臺工降充為事官今春在馬蘭谷獨修敵臺九座功為第一足贖前愆謂宜復其原職中軍官暴以平不耐塞上風寒宜備南任此皆臣與新任總督侍郎劉應節面議相同故敢就事陳乞臣又查得石塘嶺提調張延廩長馭之才盡忠之志愛士真同赤子號令則雷厲風行持已有類儒生操履實冰清玉潔力能披堅執銳

藝擅制挺彎強為臺既高於數仞又增環堵一周真可屈乎羣力設險每出於百里間為棧道幾處乃制之以多方料敵出奇允矣三軍之司命堙山塹谷屹然一路之長城喜峯口提調楊秉中狀貌可觀幹局精當撫賞三衛之降人推赤心以置其腹咸愛戴之為父母習知全鎮之地利即沙漠如指諸掌盡收拾之圖畫敵情之背向動得其真機臺座之經營真不遺乎餘力上年以才見忌因而謫官衆論咸為稱屈今歲以勞足稱將議

增秩庶謀靡不僉同自非才守俱有可觀安能內外為之翕服界嶺口守備王軫超出武流允為儒將優於綜理當衝關之盤錯每迎刃而解足占利器善事拊循凡疲卒之逃亡輒聞風而復役具見仁聲以遊擊而謫居下僚鼴勉其官畧無怨尤之意自榆林而量移界嶺勤勞所事並多戰守之功真折衝千里之才可獨當一面之任大安口提調陶世臣志安澹泊允矣同寒士之風士共苦甘居然得大將之體撫屬蕃能無箕歛軍心既

悅而游牧亦安建敵臺每竭心思人力弗疲而規模盡就一貧若洗妻子不免啼饑片言所加軍士皆如挾纊八達嶺守備王陽熟諳地形曉暢兵畧修邊能節省官銀工咸就緒建臺若經營家事制獨渾堅扼内外之要津譏察獨嚴於奸宄除戰守之戎器犀利遍滿於關城素有志於犁庭動可資以固圉鎮邊城守備胡忠年青有志守潔而勤馭疲滑之邊軍修守不遺其餘力處寒苦之荒塞操持無間於有初虛冒嚴稽升合皆還公帑

逃亡多補尺籍漸免空名淡溝守備李琚廉介有守驍  
雄善戰韜鈴能習志每切於四方騎射夙閑力可挽乎  
十石才猷精練豈徒為一路之優號令嚴明真可作三  
軍之帥黃花鎮守備李世臣性資近實修守能勤築臺  
則堅麗俱備壯矣金湯種樹而處置得宜鬱然保障四  
季馬無倒損兩防心不怠荒永平守備李沛志欲有為  
才堪大受法令期於必行即權要而莫之阻撓操持素  
稱不染在交際而亦辨是非築臺頭之城高厚可垂於

保障種嶺口之樹採辦不擾於編氓灰嶺口守備谷九  
阜年齡英妙膽氣驍雄勤勞素稱於渤海才望益茂於  
天山勾各衛之逃軍督責嚴而補解甚衆修灰嶺之重  
險區畫當而防禦多資長峪城提調曾煌洞悉軍情素  
閑邊務當絕疲之地而整頓以漸蠱壞者遂皆足觀馭  
極滑之軍而招徠多方逃亡者復歸於伍設備則有倫  
有要事集而衆不為勞修臺則不疾不徐工成而制亦  
盡善牆子嶺提調王祿勇敢可以折衝質實而不避事

守邊任櫛風冒雨之苦真可為士卒之倡修臺有牴足  
胼手之勞蓋不負主帥之託官久扼於下位自每嘆其  
數奇志不懈於有初人亦稱其難得永安營坐營指揮  
畢英武科妙選寒士清操查椿朋則以時追徵弊革侵  
漁制器械則務為犀利料無冒破攝新舊之城操職業  
修而地方不擾練應援之標騎行伍實而士卒歸心以  
上諸臣可備都司遊擊之選內楊秉中以才見忌落職  
一階人所共惜臣固已言之謂宜復其原官俾之久任

累至高官以重貢道魯煌則宜就近推補白羊口守備  
慎固邊關者也臣又查得永安營標下存操把總千戶  
周相才長撫馭事善調停管軍能勤於訓練分數獨明  
修城則務為高堅保障攸恃在長峪被誣當時之公論  
共惜以去後見慕今日之遺愛猶存原任山西馬邑守  
備見充為事官薛柱才堪幹濟志復純誠承委則終日  
僕僕不得少休曾無悞事奉法則一念兢兢固敢或懈  
雅有畏心糲食垢衣僅足充其口體長鎗勁弩尚有志

於邊陲管南兵千總吳惟忠賦性精明存心忠實由行伍而起家身經百戰與士卒而同苦義服三軍前後凡部斬親斬級過千餘先今管南兵北兵守如一日管車營千總楊瑄少年銳志赤膽英才馭部曲而一塵不染譽已振于粵南練車騎而四營皆精能尤徵於薊北韜鈴得之家學擊刺之藝兼工忠義本於性成節制之法尤善嘗經戰陣綽有機謀軍門標下左營中軍官李添爵資性純實才器老成騎射優長可備衝鋒之選號令

嚴肅堪稱節制之師督造軍器指揮路寧青年有志偉  
貌多能義不辭難激烈每懷於世眷心能持正精勤益  
勵於危途造兵器而節省俱多已見清修之節督邊工  
而調度有法足徵綜理之才軍門標下車營千總盧述  
起自布衣曾學軍旅嚴凝有義不忘一飯之恩清介無  
私能節千金之費臨陣多赳赳之狀論事有謗謗之風  
教練車營成率然之陣勢督造臺座壯美哉之山河燕  
河營中軍千戶葛紹忠年力精強資性警敏管中軍而

毫無所染儘得士卒之懽心造軍器而事必求工有裨  
戰守之實用論軍情明若觀火幹邊事視之猶家練援  
兵千總葉鱠體貌修揚性資純雅早歲業儒頗知經術  
壯年就武亦習韜鈞節省佛朗機料價一千餘兩毫髮  
不苟督造虎蹲砲三百餘位委用稱能多藝多材任怨  
任事操練各提戰陣能轉弱以為強監督總鎮標遊皆  
知方而有勇管督三路敵臺千總陳子鑾率族從戎功  
名在於閩浙挺身赴薊勞效著於邊陲督防三路以一

人之才而兼十提調之責總管百臺竭五尺之力而事  
三將官之間純誠足尚勤慎可嘉南京府軍左衛指揮  
史臣江東世胄武舉真才騎射熟閑可副馬革之念操  
持清潔雅稱羔羊之風監督敵臺監修關塞無委而不  
殫心思之勞督軍守禦督軍成造每事而必竭股肱之  
力軍門贊畫百戶祝璕早遊庠校晚習韜鈐投筆請纓  
雅負驍騰之志揮戈策馬曾收捍禦之功力能舉於十  
鈞才足當乎一面延綏入衛遊擊李煦營中軍指揮李

鍾秀生在邊陲習知戎務拔之行伍累立戰功臨敵每  
技癢而欲前建臺則料堅而可久軍心咸服營政亦修  
永安營前哨哨總百戶張梭膽氣驍雄才思英敏穿楊  
有百步之巧射藝獨優持身擅一節之長士心咸服軍  
門督陣千戶王秩心如赤子居常則口訥無言貌比儒  
生臨陣則勇敢獨著昔在閩海以累功而起家今屬薊  
門亦督備而致力積日累月圖有補於涓埃蹈矩循規  
真不踰於尺寸以上諸臣在常薦多所弗及既沮夫人

前進之心而遇守備提調之缺往往借才異地又失因  
才器使之義故併薦之以備守備提調之選者也臣又  
查得河南領春班指揮同知某統馭無方侵尅有跡洪  
山口提調某徒負血肉之軀全無幹理之具侵漁日肆  
貪鄙愈彰大毛山提調某年近衰遲志更庸劣懦不能  
振甘受侮於屬蕃慾則無剛任多怨於部士一籌不展  
無惑其防禦之疎百計自營共訐其誅求之巧真定守  
備某性資粗俗志行貪汚雖屢中武科畧知文事再試

軍旅無補邊防承乏謬蒙錄用正奮身圖報之秋倚勢  
輒肆貪求皆剥軍害民之事此四臣者所宜革回原衛  
帶俸差操者也分守石門寨守備某景逼暮齡志惟私  
橐先年抗節辯主帥之寃誠有一善之可取今日喪心  
恣溪壑之慾又何寸朽之足言此一臣者相應行令致  
仕以示曲全者也遼東長永備禦徐永昌才識明敏性  
亦慈祥管局捕未嘗淫刑以逞掌衛印且能與軍相安  
但以繩墨之才難任防托之事敵愾禦侮終非所長玩

冠殃民勢當見斥白馬關守備戴詔行已素知向上臨  
事不克慮終防範空疎任屬蕃之出入而莫之禁法令  
寬縱受尖哨之玩弄而不敢言氣已索然即一籌而難  
展心亦灰矣惟得去以為安但操守原無可議而臺工  
亦有足取遠爾終棄似屬過苛此二臣者所宜量調腹  
裡地方以全器使者也白羊口守備王平修工能勤守  
邊亦慎年力意氣皆尚未衰操守幹才俱無可議但以  
風患風疾今復舉發步履必藉人扶邊事豈復堪任此

一臣者所宜革回聽其病痊別用者也伏乞勅下該部  
再加查訪如果臣言不謬將戚繼光楊四畏重其委寄  
以策奇勲李成梁聽其久任以需茂建胡守仁等循資  
擢用張臣董一元改入總督軍門標下統領標兵羅端  
照例進階推補古北口李如樞推補牆子嶺王祿推補  
太平寨分守地方王邦憲復其原職照舊領班暴以平  
遇有南方都司遊擊員缺酌量推補楊秉中量復原職  
照舊守備喜峯口魯煌推補白羊口周相推補長峪城

薛柱等遇

缺

二鎮守備提調員缺亦各就近推補

李超免其提問方某等革回原衛帶俸差操李某行令  
致仕徐永昌戴詔量調腹裡簡僻地方王平革回待其  
病痊別用如此則任使皆宜而功罪各當邊備為有裨  
矣

議撤防春兵馬疏

據總理練兵事務兼鎮守薊州等處地方總兵官右都  
督戚繼光呈稱奉臣案驗行仰會同巡撫衙門督令各

路將領等官多差人役出邊遠哨東西各路有無結聚情形及查各該官軍派築臺工有無通完酌議應於何時撤放具由呈報以憑題請等因遵依行據副叅等官董一元羅端等各呈報差人遠出邊外哨無大隊結聚緣由及查隆慶元年防春官兵於五月初缺日奉文撤放隆慶二年於五月二十四日撤放上年因閏六月乃以中分六月為期今照本年五月將終各兵自正二月上邊修守勞苦已久即今暑氣鬱蒸理宜憫放休息除

該見面交代與應留過夏及新到入衛兵馬外其餘合  
照上年題准事理將臺工已完者先准撤放未完者必  
待工完始放等因又據鎮守昌平等處總兵官署都督  
僉事楊四畏呈稱遵依行據副總兵程九思叅將孫山  
等各呈稱差人出邊暗哨至襄縣三岔口湯河等處瞭  
無北兵踪跡取據獨石叅將麻貴回稱獨石邊外地名  
金字河雙海子野狐子耳朵桃害等處各有北兵或五  
百或一千餘騎在彼牧馬等因各呈到臣并准整飭薦

州等處邊備兼巡撫順天等府地方都察院右僉都御史劉應節咨報相同臣惟邊防有嚴緩之時戍卒有番休之例蓋所以因時而節養其力以備戰守也查得每歲防春官軍俱於五月初中撤放乃今歲屢報各部合謀將欲分道入侵而辛愛領衆屯住滿桃兒近邊地方又獨石邊外哨多游騎其情叵測是以未敢議撤今雖哨報辛愛北去各邊外俱無南侵踪跡然獨石之外猶有屯牧之衆防範之機誠難定料但五月已盡炎暑鬱

蒸各兵勞苦既久期至情動似難久留且其間多係仍  
該防秋之數亦應早得放回收養整撫以便依期赴戍  
今既該鎮巡等官查議前來相應題請合無准照上年  
事規將各原分布防春官軍內係該見面交代與查其  
臺工未完者容臣徑自酌行其各該入衛官軍與臺完  
班軍俱行撤收回營蓄養銳氣整治衣甲器械依期赴  
邊防秋仍行各將領將各主兵并該留及新到入衛延  
固寧夏兵馬四枝相兼酌量分布防守一面多方哨探

萬一有警速即飛報臣等督撫鎮協衙門相機調發標下兵馬前去策應務保萬全如此庶軍士不致久勞而邊防得以保固矣如蒙乞勅兵部再加查議上請行臣遵照施行惟復別蒙定奪

議撤防秋兵馬疏

據鎮守薊州等處總兵官右都督戚繼光呈該臣行仰哨探東西諸路有無屯結踪跡果否遠遁即便會同巡撫兵備衙門酌議防守兵馬應於何時撤放并查舊規

該留客兵與各該官軍作何分布防冬一併呈報以憑  
具題等因依蒙行據古北石塘馬蘭太平等路副叅等官  
董一元陳勛等各回稱差人遠出邊外哨探並無大  
隊結聚等情且防秋警報重大各該官軍晝夜擺守曾  
無時刻懈怠比之往年勞苦倍甚即今已值冬深寒凍  
似應憐恤撤放仍督勵各路主兵嚴謹防守其固原遊  
擊劉葵延綏遊擊陳天福二枝兵馬應照舊規存留相  
兼備禦倘有警息聽臣調發與同各枝標兵策應截殺

等因又據昌平總兵官楊四畏呈稱依蒙帖行事理督行黃花居庸橫嶺等路副叅等官程九思孫山楊鏗等各分投哨報據各回稱差人遠出賈兒嶺至襄礮三岔口湯河及於宣府獨石邊外各哨無北兵結聚消息舊規應留寧夏兵馬一枝駐劄黃花鎮與本路主兵相兼防守其各該官軍秋防久勞似應早為撤放等因各呈到臣并准巡撫順天等府地方右副都御史劉應節咨及據密雲等兵備道副使等官王惟寧等各呈報相同

據此案照先為分布兵馬以慎秋防事該臣督同鎮巡等官戚繼光等將本年防秋兵馬酌量分布具題該兵部覆議題奉欽依備咨前來通行遵照嚴加備禦外尋准兵部咨為東西大隊糾聚近邊聲犯宣大謀窺薊昌申飭內外戰守機宜以拱護京陵事該宣大總督右都御史王崇古具題前因該兵部覆議題奉聖旨着譚綸嚴督鎮巡等官加謹防禦王崇古等整搠人馬相機策應各要竭心奮力殺敵奏功將卒有不用命者都許以

軍法行事京城內外防守事宜你每詳議來說欽此欽  
遵備咨到臣臣莊誦天語不勝感奮通行督勵文武臣  
僚大小將帥各將邊備嚴加整飭仍與撫鎮等官劉應  
節戚繼光楊四畏等歃血設誓各務奮不顧身期於盡  
立邊功以報陛下已又伏蒙陛下特加大賚激勵三軍  
沿邊將士感恩思奮勇氣百倍而廟堂之上調給兵食  
區畫防禦視昔又萬倍加嚴西自宣大東至遼陽南則  
保定應援之兵勢如雲擁同時並集以故彼衆聞風落

瞻畏威宵遁我無亡矢遺鎩之勞而彼則有東西調集  
曬肉掠馬之費此皆仰仗皇上天威震疊廟算萬全得  
先發制人之策收不戰屈人之功臣等藉是得免償事  
之罪誠為千載奇遇所據防秋兵馬既經鎮巡等官查  
議前來相應題請伏乞勅下兵部再加酌議具題轉行  
新任總督侍郎劉應節查照舊規將應留固原遊擊劉  
葵延綏遊擊陳天福寧夏副總兵蕭文奎兵馬三枝與  
應該見面交代等兵及存留烏銃南兵相兼各路主兵

分布備冬仍嚴督總協等官各整搠標兵防意外之警各知不待調遣星馳相機援截其餘各該客兵俱准撤放回營休息一面通行各鎮督撫等官將防春該班兵馬查照題准事規上緊整搠依期督發赴戍惟復別賜定奪

懇乞天恩俯容辭免重任以圖安分盡職疏

本月十二日准吏部咨為懇乞聖斷早復京營舊制以一事權以圖萬世治安事該本部等衙門會推協理京

營戎政題奉聖旨是譚綸陞都察院右都御史兼兵部  
左侍郎協理京營戎政寫勅與他欽此欽遵備咨到臣  
臣聞命自天無任感激無任恐懼竊惟戎政為國之大  
事右都乃今之上卿况當營制載更之時皇上勵精之  
日必得忠誠茂著才識素優之臣乃可以厭服羣望振  
起六師若而臣者學不通方志多泥古徒有任事之愚  
殊寡御衆之具過不自量冒然承乏必至上負任使伏  
望皇上鑒臣愚忠俯容辭免新命俾仍舊官安分盡職

臣下情無任缺

切祈仰之至



譚襄敏奏議卷十